

DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS  
manè discutienda, in Scholis Medicorum, die Jovis decimo  
mensis Decembris, Anno Domini M. DCC. L.

M. ANNA - CLAUDIO DORIGNY,  
Doctore Medico, Præside.

*An succorum dissolventium alio præcipuum sit digestionis instrumentum?*

I.



DIGESTIO est actio naturalis quæ cibi antè in ore præparati, mox in ventriculo ita alterantur ut ex iis nascatur pulcra illa cineritia quæ postea in intestinis, ulteriore partium solutione, in liquorem lacteum chyli nomine cognitum evadit. Opus nunquam satis mirandum quod alimenta tam diversi generis, saporis, odorisque, vegetantia, animantia; acida, alkalina; acria, dulcia; amara, insipida; aromatica, inodora; oleosa, terrea, aquea eâ temperatione inter se permiscet, ut in iis nullus neque odor, neque sapor, nisi dulcedo lactis ampliùs percipiatur. Ad tantam verò mutationem producendam quot & quanta per canalem alimentarium vel leviter attendenti sese offerunt concurrentia. Hic dentes triplicis generis, cibos dividunt, lacerant, conterunt: illic calor humidus ventriculi, alimenta coquit, mollique tepore brevè in liquamen resolvit. Ibidem aer in interstitiis ciborum compressus priùs & quiescens, nunc autem à calore rarefactus omnia sibi opposita repagula diffringit, alimentorumque firmiorem compagem solvit. Interea ventriculus motu proprio, alternâque diaphragmatis actione, viscerumque abdominis reactione adjutus, molli versatione alimenta modò huc, modò illuc impulsa exercet. Undè quaque succorum dissolventium erumpit scaturigo, saliva, mucus faucium, liquor œsophagi, succus gastricus, bilis utraque, succus pancreaticus, liquor intestinalis, spiritus denique animales, quorum quisque alimentis, dum iis permiscetur, characterem imprimit animale. Multa quidem & varia hic videmus digestionis instrumenta; quodnam autem ex his sit præcipuum, & scire plurimi referunt, neque ita extricatu facile est. Interim quod digestionis essentiam constituit, quod ubique semper & abundantius in totâ alimentorum viâ reperitur, ad quod denique omnia alia referuntur, illud præcipuum vocandum esse, digestionis instrumentum nemo negaverit.

I I.

DIGESTIONIS essentia consistit in partium mucidarum quæ solæ sunt propriè nutritivæ, salinarum, & oleosarum extractione, earumque tam arti-

A

ficiosa permixtione ut exurgat humor albus, blandus, homogœneus qui indolem animalis aliquâ parte jam referat. Quod autem digestio sit extractio, illud abundè probat chyli compositio. Porro chylus ex multâ aquâ sive sero, globulis pinguibus & quâdam parte mucilaginosâ constat. Illud & ars chemica & microscopium omnibus manifestè demonstrant; imò quotiescumque semina oleosa, verbi gratiâ, amygdalas dulces in mortario, assusâ identidem aquâ, cum pistillo diù conterrimus, toties liquorem album dulcemque obtinemus, qualis est chylus, nisi quod hic ad naturam animale magis vergat. Jam verò hæc principia, nempe oleum & mucilago, abundè in omnibus quibus utimur alimentis reperiuntur, ut patet ex eorum analysi; aqua autem sufficit tum ex potu, tum ex salivâ, succo gastrico aliisque humoribus diluentibus. Cum ergo principia ex quibus chylus conficitur integra in alimentis reperiuntur, non videtur ad chylicationem putrefactionis motu aut aliquo fermento opus esse. Non tamen ad digestionis essentiam simplex sufficit extractio, sed præterea accurata principiorum permixtio necessariò requiritur. Hæc enim deficiente, principia quæ sibi unita chylum blandum, omnibusque corporis partibus tum liquidis tum solidis reficiendis inservientem constituunt, eadem separata totum corpus conturbarent, verbi gratiâ, sal ab oleo secedens acedine suâ solidas corroderet partes, oleum canales obstructos secretionibus redderet inhabiles, aqua item ab aliis principiis separata, statim diffunderet. Denique ad essentiam digestionis necesse est ut caracter vitalis succis extractis imprimatur. Digestionis enim scopus est ut alimenta suam paulatim deponant naturam, nostram induant. Quid autem ex omnibus digestionis instrumentis, principia alibilia faciliùs extrahit, intimiùs permiscet, meliùs denique caracterem imprimit animale quàm succorum dissolventium actio: imò sola est quæ tria hæc digestionis essentiam constituentia immediatè producit. Cætera quæ ad digestionem concurrunt, terminum actionis suæ non assequuntur, nisi quatenus priorem adjuvant. Ponamus enim accuratum, qui fit in ore, tritum, calorem ventriculi humidum, aëris elastici expansionem, denique mollem massæ alimentariæ versationem, quid demum fiet? Panis omniaque ferè vegetabilia acescent, animalium carnes putrescent, olea rancidam induent naturam, quæ quidem omnia, destructæ digestionis certa sunt indicia. Nulla hæc sicut per actionem succorum dissolventium fit extractio, nulla permixtio, nulla assimilatio.

## F I I.

**H**IC autem nova elucescit ratio quâ inducamur ad credendum succorum dissolventium actionem in digestionem præcipuo munere perfungi. Quod enim ubique, quod semper, quod abundantius in totâ alimentorum viâ reperitur, illud certè præcipuum vocari debet digestionis instrumentum. Porro si ab ore ad anum usque, totam alimentorum sistusam vel leviter oculis perlustremus, quot apparent glandulæ, imò viscera suos humores copioso jugiter fluore ad alimentorum dissolutionem præbentia, ita ut nullum hujus tractus ferè sit punctum quod suo humore peculiari non fœteat. De quantitate horum collectivè sumptâ inter autores non multùm constat. Quidam omnium humorum summam, qui intra diem naturalem fecernuntur & in canalem alimentarium effunduntur, non infra (a) quadraginta libras medicas esse putant. Nec â vero multùm recedere illud videbitur, si attendas ad exemplum hujus militis stationarii, cui, (b) cum ductus Stenonis alter fuisset præscissus, per hunc canalem inter manducandum, idque per breve tempus, singulis vicibus tanta effluebat salivæ copia, ut plura madefceret mantilia. Atqui ex unâ tantùm fluebat parotide humor, quanta ergo esse debet summa omnium humorum qui è tot glandulis, superficiebusque rorem tenuissimum jugiter exhalantibus quotidie secernuntur. Quod autem de homine constat, illud in avibus, quadrupedibus, piscibusque eruditissimè demonstrarunt Brunnerus & Peyer. Ad quid verò tanta humorum ad digestionis officinam properantium copia,

(a) Haller, anat. Acad. p. 328.  
(b) Mém. de l'Acad. des S.  
1719.

nisi esset præcipuum digestionis instrumentum, præsertim cum aliunde constet in piscibus digestionem solâ ferè succorum dissolventium actione perfici. In iis enim calor admodum debilis est, tritusque nullibi contingit neque in ore, integros vorant pisces, neque in ventriculo qui membranaceus est. Nihilominus in piscibus digestio, ut in quadrupedibus, quamquam longiori tempore, æquè perficitur. In ventriculo mustelæ fluvialis reperit Brunnerus (c) piscem cujus squamæ, carnes & spinæ in liquamen dissolutæ contabuerant. Pars piscis devorati dextra quæ ventriculi parietem contingebat, menstrui efficaciam jam experta erat, squamis carni-  
(c) Brun. de Gland. p. 103.

bustisque resolutis; sinistrum & oppositum latus, propter curvaturam, parieti ventriculi non contiguum, sed aversum, squamis adhuc tectum fuit & integrum: intestina quoque piscis integra erant. Usque adeò verum est, succum ex glandulis stomachicis exsudantem, assumpta dissolvere & succellivè & corticatim, prout assumptorum superficies obvenit & parietem ventriculi contingit. Neque fermentationi aut putrefactioni illa mutatio tribui potest, quandoquidem si ex fermentatione orta fuisset dissolutio, interiora ut exteriora molisalimentariæ contabescere debuissent.

## I V.

**E**T certè illud meritò vocatur præcipuum digestionis instrumentum, ad quod alia quæcumque referuntur digestionis instrumenta. Porro illa omnia sigillatim revolve, nullum perfectò reperies quod à naturæ instituto ad actionem succorum dissolventium adjuvandam, non sit destinatum; tritus enim ille, qualis in homine & quadrupedibus fit in ore, in avibus autem in ventriculo carnosio, non est nisi actio præviâ quâ ad dissolutionem disponuntur alimenta. Hunc in modum Chemicis ex aliquâ substantiâ durâ, v. g. Guaiaco resinam aut oleum extrahere intendens, Guaiacum in minutissimum pulverem redigit, scilicet ut illud actioni dissolventis magis pateat. Sed quantumcumque tritaveris, si dissolvens non applicetur, nihilo plus proficies; & hæc est ratio quare in ruminantibus, si consideraveris fœnum in reticulo, idem prorsus ac fœnum vulgare, licet post repetitum sub dentibus attritum, appareat, nisi quòd in particulas minutissimas sit concisum, majorique humiditate perlusum. In sequentibus ventriculis nulla mutatio essentialis conspicitur nisi in abomaso, ubi in liquorem viridem convertuntur alimenta, quibus abundè patet dentium trituram digestioni inservire, non perficere digestionem. Illud idem calori ventriculi humido & aëris elastici expansioni applicari potest. Utrumque certè multum valet ad digestionem promovendam, sed prout liquorum dissolventium intendit actionem. Menstruorum enim efficaciam mirum in modum calor adauget, in quo quidem opere ab aëre rarefacto supraque reperculso non parum adjuvatur; undè in machinâ Papinianâ & celeriores & intimiores fieri corporum solutiones, fidâ constantique docemur experientiâ. Ex eo igitur probatur calorem in totâ alimentorum viâ, de naturæ instituto ad actionem succorum dissolventium esse destinatum, quòd per se hanc promoveat, ut patet ex Chemicis, & aliunde concipi non possit quo alio modo digestionem adjuvaret. Quid dicam de actione ventriculi in ingesta? Nonne in propatulo est, hanc nihil aliud esse quàm mollem versationem quâ modò huc, modò illuc impelluntur alimenta, ne ulla ciborum particula, dissolventium actionem effugiat. Omnia ergò alia digestionis instrumenta ad hanc referuntur actionem.

## V.

**S**ED dum pro simplici alimentorum in ventriculo dissolutione jam concludimus, Ecce novus metam ferè assecutis incumbit labor, fermentationis nempe fautorum captiosas refellendi objectiones. Quæcumque enim ad ciborum dissolutionem adjuvandam concurrere superius probavi, illa quâdam veluti necessitate fermentationem producere contendunt. Quoties nempe, inquit, materia fermentationis cum calore proprio & aëre adest, non potest fieri quin oriatur fermentatio; sed panis ex indole suâ acescit, fermentatur, carnes suâ sponte in putredinem ver-

gunt; nascetur utique fermentatio, & eam fieri efficaciter demonstrant ascenden-  
tes ructus & vagi borborygmi. Equidem fateor in ventriculo materiam adesse fer-  
mentationis capacem cum calore & aëre; sed ibi quoque adsunt plura fermenta-  
tionis impedimenta, nempe calor ventriculi multò major quàm ad fermentationem  
requiritur. Præterea in ventriculo abundantis humoris perpetua fit accessio,  
in duodeno bilis acerrimæ affusio, quæ ambo fermentationi sunt insensibili-  
ma; adde quòd ventriculus perpetuò agitur tum proprio motu vermiculari,  
tum alterius diaphragmatis depressione, viscerumque abdominis repensione. Porro  
omnes horum quantum fermentationi obstat agitatio. Non potest igitur à priori pro-  
bati fermentationem fieri in ventriculo: nec magis à posteriori. Qui sunt enim  
effectus ex quibus præsentia ejus demonstretur? Num ructus acidi, tormina ventris  
aut vagi borborygmi? Quæ contingunt in digestionem perturbatâ vel destructâ,  
nisi forsân quis dixerit primum requiri fermentationis motum ut vegetabilium  
firmior laxetur mixtio; sicque naturæ animalis propius accedant. Sed ille motus tan-  
tum videtur locum habere in iis quorum nimia debilitas alimentorum tenaciorem non  
potest superare naturam. Quibus autem robusta contigit corporis constitutio, hanc  
ad fermentationis motum vegetabilium propensionem facile vincunt, horumque ru-  
ctus nidorem sæpius alkalescentem, quàm acidum spirant. In his igitur validâ tantum soli-  
dorum, succorumque dissolventium actione fit, ut vegetabilia suam paulatim amittant  
tenacitatem: imò quibus propter debilitatem vegetabilia in ventriculo acescunt,  
acidam illam brevè in duodeno deponunt indolem, simul atque bilis cum materiâ  
chyli pultaceâ miscetur, ita ut fermentationi chylicatio nullo modo possit ascribi,  
nedum fermentatio pro præcipuo haberi debeat digestionis instrumento. Ego verò,  
cùm superius solidis, ut mihi videtur, argumentis demonstraverim succorum dis-  
solventium actionem, 1º, ad digestionis essentiam constituendam immediatè con-  
currere, 2º, ubiquè, semper, & abundantius in totâ alimentorum viâ reperiri,  
imò solam penè quandoque digestionis opus perficere, 3º, omnia alia digestio-  
nis instrumenta ad ipsam referri, quid impedit quominus concludam quod pro-  
bare intenderam.

*Ergo succorum dissolventium actio præcipuum est digestionis instrumentum.*

II DOMINI DOCTORES DISPUTATURI.

M. Martinus Noguez.	M. Joannes Mac-Mahon.	M. Michael - Philippus Bou- vart, Professor Regius & Regiæ Scientiarum Academiæ Socius.
M. Ludovicus-Alexander Ger- vaisse.	M. Franciscus Thiery.	M. Michael-Josephus Majault.
M. Ambrosius Hosty.	M. Anna-Claudius Dorigny, Alîus Præses.	M. Antonius Ferrcin, Professor Regius, Regiæ Scientiarum Academiæ Socius, & in Horto Regio Anatomæ ac Chirur- giæ Professor.

Proponebat Parisiis JOANNES-BAPTISTA THURANT, Parisinus,  
Saluberrimæ Facultatis Medicinæ Parisiensis Baccalaureus, A. R. S. H. 1750,  
A SEXTA AD MERIDIEM.